



Sambanwá

GIYA SA PAGSAMBA KAN BANWAAN NIN DIOS

IKA-XXI DOMINGO KAN ORDINARIONG PANAHON
22 AGOSTO 2021 • TAON B • VERDE

RITO SA PAGPOÓN

Pataratara

C — Pag-alaman sa Pagtubod:

An pag-ako kan Sacramento nin Matrimonio, sarong tanda na an duwang tawo igwa nin pagtubod asin tiwala sa lambang sarô. An mag-agom minasarig sa kakayahan kan lambang sarô anoman an mangyari sa sainda. Siring man kaini an relacion niato sa mahal na Dios. An tunay na pagtubod niato siyang bakong gikan sa pakasabot kundi gikan sa pagsarig niato sa mahal na Dios. Siring sa pagkamoot, an pagtubod mina-agi sa panahon nin kadikloman na kun saen minaluya an paghiling niato sa mahal na Dios. An Dios, kundi consecuencia kan maluyang natura kan tawo na iyo an nagpapadiklom kan saiyang pagtubod. An mga babasahon ngonian manonngod sa mga pangako na ginigibo nin huli kan dakulang pagtubod asin pagkamoot.

Antifona sa Paglaog

(Cf. S 85, 1-5)

(Sinambit kun mayo nin Awit sa Paglaog)

Kagurangan, idongdong mo an talinga mo sako, asin hinanyoga ako. Dios ko, ligtasan an saimong surogon na naglalaom saimo. Kaheraki ako, Kagurangan, ta bilog na aldaw nagkurahaw ako saimo.

Pagpangurus asin

Pagtaong-galang (Tindog)

P — Sa ngaran kan Ama, asin kan Aki, asin kan Espiritu Santo.

B — Amen.

P — An Kagurangan mapa-saindo.

B — Asin sa saimong espiritu.

Gawe nin Pagsolsol

P — Mga tugang, akoon ta an satong mga kasâlan, tanganing magkanigo kitang magcelebrar kan mga banal na misterio.

Gabos — Nagkukumpisal ako sa Dios na makakamhan, asin saindo, mga tugang, ta nagkasalâ ako nin makuri sa isip, sa tataramon, sa gibo, asin sa kapabayaan: salâ ko, salâ ko,

makuring salâ ko. Kaya nangangadyi ako ki Santa Maria, danay na Virgen, sa gabos na Angeles asin Santos, asin saindo, mga tugang, na ako ipamibi sa Kagurangan tang Dios.

P — Maherak man lugod satô an Dios na makakamhan asin, pakapatawada an satong mga kasâlan, darahon kita sa buhay na daing kasagkoran.

B — Amen.

Kagurangan, maherak ka

P — Kagurangan, maherak ka.

B — Kagurangan, maherak ka.

P — Cristo, maherak ka.

B — Cristo, maherak ka.

P — Kagurangan, maherak ka.

B — Kagurangan, maherak ka.

Kamurawayan

Gabos — Kamurawayan sa Dios sa kaitaasan asin sa dagâ katoninongan sa mga tawong marahay an boót. Inoomaw mi ika, rinorokyaw mi ika, sinasamba mi ika, pinapamuraway mi ika, pinapasalamatan mi ika huli kan dakula mong kamurawayan, Kagurangan na Dios, Hadeng langitnon, Dios Amang makakamhan. Kagurangan Aking Bogtong, Jesu Cristo, Kagurangan na Dios, Cordero kan Dios, Aki kan Ama, ika na nagpaparâ kan mga kasâlan kan kinaban, kaheraki kami; ika na nagpaparâ kan mga kasâlan kan kinaban, akoo an samong pakimaherak; ika na nagtutukaw sa too kan Ama, kaheraki kami. Ta ika sana an Banal, ika sana an Kagurangan, ika sana an Orog Kahalangkaw, Jesu Cristo, kaiba kan Espiritu Santo: sa kamurawayan kan Dios Ama. Amen.

Colecta

P — Mamibi kita.

O Dios, na ginibo mo an kaisipan kan mga paratubod na magin sarô sa boót, tawan sa saimong banwaan na kamotan an binoboót mo, na mawoton an pinapanuga mo, tanganing, sa

tahaw kan mga kinabanon na katibaadan, an samong mga puso mapamugtak diyan, kun saen yaon an mga tunay na kaogmahan. Huli ki Jesu Cristong Kagurangan niamo, saimong Aki, na kaiba mong nabubuhay asin naghahade, kasarô kan Espiritu Santo, Dios, sa gabos na kapanahonan kan mga panahon.

B — Amen.

LITURGIA KAN TATARAMON

Enot na Babasahon (Tukaw)

(Josue 24, 1-2. 15-17. 18)

Pagkagadan ni Moises, ipinadagos ni Josue an paggiya sa mga Hebreo pasiring sa banwaan na panuga. An enot na babasahon dapit sa pakikipagtipan sa Shechem na sarong pagbâgo kan tipan na ginibo sa Sinai. Binâgo ninda an saindang panuga na magdadanay sinda sa pagtubod ki Yahweh.

Pagbasa sa Libro ni Profeta Josue

Tiniripon ni Josue an gabos na tribo nin Israel duman sa Sikem asin inapod an mga gurang, mga poon, mga hukom asin mga escriba nin Israel asin nakiatubang sinda sa Dios. Si Josue nagsabi sa gabos na katawohan: “Kun habo kamong maglingkod sa Kagurangan pilion nindo ngonian kun siisay an boót nindong paglingkodan. Boót kamong maglingkod sa mga dios-dios na pinaglingkodan kan saindang mga magurang duman sa ibong kan salog, o sa mga dios kan Amorites sa dagâ na ngonian saindang pinag-eerokan? Para sako asin sa sakuyang Harong kami maglilingkod sa Kagurangan.” An mga tawo nagsimbag: Dai kami nag-isip na magtalikod sa Kagurangan asin maglingkod sa ibang dios! Bako daw na an Kagurangan iyo an nagdara sato asin kan satong mga magurang hale sa dagâ sa Ehipto, harong nin kaoripan? Bako daw na siya an naggibo nin dakulang mga ngangalasan sa atubang nin satong mga mata asin nagsurog sato kan kita nagbabaklay sa tahaw nin banwaan na satuyang pinag-agihan? Kami man

maglilingkod sa Kagurangnan huli ta siya samuyang Dios.

Tataramon kan Kagurangnan.

Gabos — Salamat sa Dios.

Salmo Responsorio

(Salmo 33, 2-3; 15, 22)

S — Namiti asin hilinga nindo ta an Kagurangnan marahayan.

1. Oomawon ko an Kagurangnan sa gabos na panahon, an saiyang kaomawan danay na uya sa sakong nguso. An Kagurangnan ipag-oogma nin sakong kalag. An mga mapakumbaba mahimate asin mag-oogma. (S)
2. An Kagurangnan minatalikod sa mga tampalasan tanganing paraon sa dagâ an saindong giromdom. An mata nin Kagurangnan nasa mga banal, an saiyang talinga nasa saindang pakimaherak. (S)
3. Sinda nag-aapod: dinadangog nin Kagurangnan, asin ililigtas sa gabos na kahorasaan. An Kagurangnan harani sa pusong nagsosolsol saiyang iliniligtas an mga naghohorasa. (S)
4. Kadakul an mga kasakitan nin tawong matanos, alagad sa gabos na iyan ililigtas siya nin Kagurangnan. An gabos niyang mga tulang babantayan, dai babarion saro man lamang kan saiyang mga tulang. (S)

Ikaduwang Babasahon

(Efeso 5, 21-32)

Tinawan ni San Pablo nin hararom na kahulugan an Sacramento nin Matrimonio sa ikaduwang babasahon. Para ki San Pablo, an relacion nin mag-agom nakakabaing sa relacion ni Cristo sa Simbahan. Siring man, ipinapasabot sato an kaboronyogan kan Simbahan asin ni Cristo.

Pagbasa sa Surat ni San Pablo sa mga taga-Efeso

Magkinuyog-kuyogan kamo sa saindong pagkuyog ki Cristo. Kuyogon kan mga babae an saindang mga agom asin siring na an Kagurangnan saindang kinuyog. Si Cristo iyo an pamayo kan Simbahan asin Paratubos kan bilog na hawak; siring man an lalaki iyo an pamayo kan saiyang agom na babae. Si Cristo kinuyog kan Simbahan; siring man an mga lalaki dapat na kuyogon kan saindang mga agom na babae sa gabos na bagay. An Simbahan namotan ni Cristo asin tanganing mapabanal an Simbahan na ini, idinudusay ni Cristo an saiyang buhay; siring man an mga babae dapat na kamotan an saindang agom na

lalaki. An Simbahan hinugasan niya sa tubig kaiba an tataramon nin buhay tanganing masadirihan niya, magin Simbahan na mamurawayon, daing-digta asin daing kurundot o bagay na kabaing kundi banal asin malinaw. Kaya, an mga babae kamotan kan saindang mga agom na lalaki, siring na saindang namomotan an sadiri nindang hawak. An lalaki namomoot sa saiya man sanang sadiri, kun siya namomoot sa sadiring agom na babae. Daing tawo na naoongis sa sadiring hawak, kundi pinapakakan asin inaataman. Siring kaiyan an gibo ni Cristo sa Simbahan. An Simbahan iyo an saiyang hawak asin kita an mga buhay na kabtang, huli kaini babayaan kan lalaki an saiyang ama asin ina, asin minasarô sa saiyang agom na babae: asin sindang duwa magigin sarong hawak. Ini dakulang sacramento: ini sinabi ko dapit ki Cristo asin sa Simbahan.

Tataramon kan Kagurangnan.

Gabos — Salamat sa Dios.

Pagrokyaw

(Juan 6, 53. 65)

(*Sinasambit kun dai inaawit an Alleluia*)

Alleluia, alleluia! An saimong tataramon, Kagurangnan, espiritu asin buhay: yaon saimo an mga tataramon nin buhay na daing kasagkoran. Alleluia, alleluia!

Evangelio

(Juan 6, 60-69)

Iyo ini an katapusan kan discurso dapit sa Tinapay nin Buhay na satong nahinanyog sa nagkapirang Domingo. Sa evangeliong ini, si Jesus naghulit manonongod sa pagtubod saiya, an tinapay nin buhay. An tataramon nin Dios invitacion sa pagtubod. Kagurangnan saen kami maduman? Uya kami sa pagtubod.

P — An Kagurangnan mapa-saindo.

B — **Asin sa saimong espiritu.**

P — ✠ Pagbasa kan Evangelio susog ki San Juan.

B — **Kamurawayan saimo, Kagurangnan.**

Pakadangog kan mga sinabi ni Jesus, kadakul na mga disipulos nagsabi: “Masakit na mga tataramon ini: siisay an matubod kaiyan?” Namasdan ni Jesus na an mga disipulos naggurumod-gumod. Naghapot siya sainda: “Ini nagigin dahilan nin pagkasalâ saindo? Ano daw kun mahiling nindo an Aki nin Tawo na nagsasakat paduman sa dati niyang pinag-eerokan? An

espiritu sana an nagtatao nin buhay, an laman dai nin kapakanan. An mga tataramon na sinabi ko saindo espiritu nin buhay. Alagad nagkapira sa saindo dai nagtutubod.” Aram ni Jesus poon sa kapinônan kun siisay an mga dai nagtutubod saiya; kun siisay an magpapasaluib saiya. Kaya nagsabi: “Sinabi ko na saindo na mayo nin makakarani sako kun dai tugotan nin Ama. Poon kaidto kadakul an mga disipulos na nagsiribog asin dai na nag-iba saiya.

P — Marahay na Baretâ kan Kagurangnan.

B — **Pag-omaw saimo Cristo.**

Homilia (*Tukaw*)

Pagrokyaw kan Pagtubod (*Tindog*)

Crede Niceno-Constantinopolitano

Gabos — Nagtutubod ako sa sarong Dios Amang makakamhan, kaggibo kan langit asin dagâ, kan gabos na nahihiling asin dai nahihiling. Asin sa sarong Kagurangnan na si Jesu Cristo, Bogtong na Aki kan Dios, asin namundag gikan sa Ama bagô kan gabos na panahon. Dios na gikan sa Dios, ilaw na gikan sa ilaw, totoong Dios na gikan sa totoong Dios, ipinangaki, dai linalang, saro sa pagka-Dios sa Ama: huli saiya nagkaigwa kan gabos. Huli sa satong mga tawo asin huli sa satong kaligtasan naghilig siya hale sa kalangitan.

(*Sa mga minasunod na tataramon, abot sa asin nani-tawo, an gabos minaduko.*)

Asin nani-laman huli kan Espiritu Santo ki Virgen Maria, asin nani-tawo. Ipinako pa sa cruz para satô kan panahon ni Poncio Pilato; nagtios sagkod sa kagadanan asin ilinobong, asin kan ikatolong aldaw nabuhay-liwat susog sa mga kasuratan, asin suminakat sa langit, nagtutukaw sa too kan Ama. Asin mamuraway na mabalik, sa paghukom sa mga buhay asin mga gadan, an saiyang kahadean daeng katapusan. Asin sa Espiritu Santo, Kagurangnan asin kagtao nin buhay: na gikan sa Ama asin sa Aki. Siya kaiba kan Ama asin kan Aki, sabay na sinasamba asin pinapamuraway: siya nagtaram sa paagi nin mga profetas. Asin sa sarô, banal, catolico asin apostolicong Simbahan. Nagpapahayag ako nin pagtubod sa sarong bonyag, sa pagpatawad nin mga kasalan. Asin naghahalat ako kan pagkabuhay-liwat nin mga

gadan, asin kan buhay sa maabot na panahon. Amen.

Pamibi nin Banwaan

P — Inapod biking mga profeta sa pagsaksi sa pagtubod, may pagsarig kitang madolok sa Ama asin mamibi pars sa satuyang mga pangangaipo.

S — **Kagurangnan, hinanyoga an samong pamibi.**

1. Tanganing an Simbahan sa bilog na kinaban padagos na bâgohon kan Espiritu Santo sa mision nin pagharubay ki Cristo kinaban, ipamibi niato sa Kagurangnan. **(S)**
2. Tanganing bilang sarong comunidad kita magin mga tawong nagpapamibi asin danay na andam sa pagtao kan satuyang panahon asin kakayahan sa pagtabang sa mga naghahanap kan kahulugan kan buhay, ipamibi niato sa Kagurangnan. **(S)**
3. Tanganing an mga paratukdo magdanay na maimbod sa saindang katongdan na ipasabot sa mga jovenes buhay susog sa katukdoan ni Cristo, ipamibi niato sa Kagurangnan. **(S)**
4. Tanganing an mga naghehelang asin mga maedad na sa satuyang comunidad tudok sa boót na mag-ako kan saindang cruz sa ngaran ni Cristo, ipamibi niato sa Kagurangnan. **(S)**
5. Tanganing an mga tugang niatong gadan darahon na ligtas sa kahadean kan Dios, ipamibi niato sa Kagurangnan. **(S)**

P — Langitnon na Ama, lilingya nin pagkaherak an samuyang mga kakulapohan. Tawi kami kan kusog na kaipuhan mi sa pagsabuhay kan mga tugon kan saimong Aki. Huli ki Cristo samong Kagurangnan.

B — Amen.

LITURGIA KAN EUCARISTIA

Pagdolot *(Tukaw)*

(Sinambit kun mayong Awit sa Pagdolot)

P — Inoomaw ka, Kagurangnan, Dios nin gabos na linalang, huli ta sa saimong pagka-matinao nag-ako kami nin tinapay, na idinodolot mi saimo bunga kan dagâ asin kan gibo kan mga kamot nin mga tawo, ini magigin para samo tinapay nin buhay.

B — **Pag-omawon an Dios sagkod pa man.**

P — Inoomaw ka, Kagurangnan, Dios nin gabos na linalang, huli ta sa saimong pagka-matinao nag-ako kami nin arak, na

idinodolot mi saimo bunga kan balagon asin kan gibo kan mga kamot nin mga tawo, ini magigin para samo inomom nin kalag.

B — **Pag-omawon an Dios sagkod pa man.**

P — *(Tindog)* Magpamibi kamo, mga tugang: tanganing an sako asin an saindang atang maako man lugod kan Dios Amang makakamhan.

B — **Akoon man lugod kan Kagurangnan an atang sa saimong mga kamot para sa kaomawan asin kamurawayan kan saiyang ngaran, para man sa pakinabang niato asin kan bilog niyang banal na Simbahan.**

Pamibi sa mga Dolot

P — Kagurangnan, na huli kan sarô sanang sacrificio nin pag-ampon, nabawî mo an banwaan para saimo, kaugaying warasan samo an mga balaog nin pagkasararô asin katoninongan sa saimong Simbahan. Huli ki Cristo samong Kagurangnan.

B — Amen.

Prefacio III sa mga Domingo kan Ordinariong Panahon

An pagligtas kan tawo sa paagi nin tawo

P — An Kagurangnan mapa-saindo.

B — **Asin sa saimong Espiritu.**

P — litaas an mga puso.

B — **Initaas mi na sa Kagurangnan.**

P — Magpasalamat kita sa Kagurangnan, satuyang Dios.

B — **Maninigo asin Dapat.**

Totoong maninigo asin dapat, matanos asin nakakaligtas, na danay asin minsan saen magpasalamat kami saimo: Kagurangnan, banal na Ama, Dios na makakamhan na daing kasagkoran:

Nakakagami-aw kami, na, sa daing sukol mong kamurawayan, nagsanggawad ka sa mga may kagadanan sa bagsik kan saimong pagka-dios; ata ngani itinagama mo an bulong sa samo man sanang pagka-magagadanon, asin kun ano an ikina-pahamak kan mga nawara iyo man an ilinigtas mo sainda, huli ki Cristo samong Kagurangnan.

Kaya an hukbô nin mga Angeles nagsasamba kan saimong kamahalan, nag-oogma sa atubang mo sagkod pa man. Auot pa man lugod na ipagboót mo na makasanong sainda an samong mga tingog, malodok na nagpapahayag nin pagtubod na nagsasabi:

Gabos — Banal, Banal, Banal an Kagurangnan Dios ni mga hukbô. An langit asin dagâ pano kan Saimong kamurawayan. Hosana sa kaitaasan. Paladan an minadigdi sa ngaran kan Kagurangnan. Hosanna sa kaitaasan.

Pamibi sa Eucaristia *(Luhod)*

P — Misterio kan Pagtubod.

B — **An pagkagadan mo, Kagurangnan, ipinapamareta niamo, an Pagkabuhay mo liwat ipinapahayag, sagkod na ika magdatong.**

P — Huli saiya, asin kaiba niya...

B — Amen.

RITO SA PAGCOMUNION

Ama Niamo *(Tindog)*

P — Natukdoan kan mga...

Gabos — Ama niamo, na yaon sa langit: pabanalon an ngaran mo; magdatong an kahadean mo; mangyari an boót mo sa dagâ nin siring sa langit. An samong kakanon sa aroaldaw itao mo samuya ngonian, asin patawadon mo kami sa samong mga kasâlan, siring na pinapatawad niamo an mga nagkakasalâ samuya; asin hare kami pagdaraha sa sugot; kundi agawa kami sa maraot.

P — Agawa kami sa gabos ...

B — **Huli ta saimo an kahadean, asin an kapangyarihan, siring man an kamurawayan sa mga kapanahonan.**

P — Jesu Cristong Kagurangnan ...

B — Amen.

Pagpahayag kan Katoninongan

P — An katoninongan kan Kagurangnan danay na mapa-saindo.

B — **Asin sa saimong espiritu.**

P — Magpatinaraohan kamo nin katoninongan

Cordero

B — **Cordero kan Dios, na nagpaparâ kan mga kasâlan kan kinaban: kaheraki kami. Cordero kan Dios, na nagpaparâ kan mga kasâlan kan kinaban: kaheraki kami. Cordero kan Dios, na nagpaparâ kan mga kasâlan kan kinaban: tawi kami nin katoninongan.**

Pa g-alok sa Pagcomunion *(Luhod)*

P — Uya an Cordero kan Dios, uya an nagpapara kan mga kasalan kan kinaban. Paladan an mga inapod sa pamanggi kan Cordero.

Gabos — Kagurangnan bako akong maninigo na ika magdagos sa sakuyang harong: alagad magtaram ka sana, asin an sakong kalag maomayan.

Antifona sa Comunion

(Cf. S 103, 13-15)

(Sinambit kun mayong Awit sa Comunion)

Kagurangnan, an dagâ mababasog kan bunga nin saimong mga gibo, tanganing kuanon mo an tinapay hale sa dagâ, asin an arak magpa-ogma sa puso nin tawo.

Pamibi

Pakacomunion *(Tindog)*

P — Mamibi kita.

Kagurangnan, namimibi kami, giboha an bulong na panô kan saimong pagkaherak, asin kaugaying himoa kaming magtalubo asin siring na mag-uswag, tanganing makapagaya-gaya kami saimong sa gabos na bagay. Huli ki Cristo samong Kagurangnan.

B — Amen.

RITO SA PAGTAPOS

Solemng Bendicion

Ordinariong Panahon II

P — An Kagurangnan mapasaindo.

B — Asin sa saimong espiritu.

P — Iduko an saindong mga payo asin maghagad nin bendicion sa mahal na Dios.

An katoninongan nin Dios na dai matugkad kan isip nin tawo, magdanay sa saindong mga puso asin isip, sa pagkamidbid asin pagkamoot sa Dios asin sa saiyang Aki, si Cristo na satong Kagurangnan.

B — Amen.

P — Asin bendicionan kamo kan Dios na makakamhan: an Ama, asin an Aki, ✠ asin an Espiritu Santo.

B — Amen.

P — Lakaw kamo sa katoninongan ni Cristo.

B — Salamat sa Dios.



GIYA SA PAGMISA SA SEMANA

Agosto 23, Lunes

Santa Rosa de Lima, *Virgen, Puti*
Ikaduwang Patrona kan Filipinas

Misa — Hilingon sa Misal Romano sa Bicol: Propio nin mga Santos – p. 197
Mga Babasahon — 1 Tes 1, 1-5. 8-10 | S 149, 1-2. 3-4. 5-6. 9 | Mt 23, 13-22

Agosto 24, Martes

San Bartolome, *Apostol, Pula*

Misa — Hilingon sa Misal Romano sa Bicol: Propio nin mga Santos – pp. 197-198
Mga Babasahon — Kap 21, 9-14 | S 145, 10-11. 12-13. 17-18 | Jn 1, 45-51

Agosto 25, Miercoles

Miercoles sa Ika-XXI Semana kan Ordinariong Panahon, *Verde*
o Memorial ni San Luis, Hade, Puti
o Memorial ni San José de Calasanz, Padi, Puti

Misa — Propio kan Aldaw, Prefacio Comun I-VI
o hilingon sa Misal Romano sa Bicol: Propio nin mga Santos – p. 199.
Mga Babasahon — 1 Tes 2, 9-13 | S 139, 7-8. 9-10. 11-12 | Mt 23, 27-32

Agosto 26, Jueves

Jueves sa Ika-XXI Semana kan Ordinariong Panahon, *Verde*

Misa — Propio kan Aldaw, Prefacio Comun I-VI
Mga Babasahon — 1 Tes 3, 7-13 | S 90, 3-5. 12-13. 14. 17 | Mt 24, 42-51

Agosto 27, Viernes

Santa Monica, *Puti*

Misa — Hilingon sa Misal Romano sa Bicol: Propio nin mga Santos – p. 200
Mga Babasahon — 1 Tes 4, 1-8 | S 97, 1. 2. 5-6. 10. 11-12 | Mt 25, 1-13

Agosto 28, Sabado

San Agustín, *Obispo asin Doctor kan Simbahan, Puti*

Misa — Hilingon sa Misal Romano sa Bicol: Propio nin mga Santos – pp. 200-202
Mga Babasahon — 1 Tes 4, 9-11 | S 98, 1. 7-8. 9 | Mt 25, 14-30



sambanwá
GIYA SA PAGSAMBA KAN BANWAAN NIN DIOS



MOST REV. ROLANDO J. TRIA TIRONA, OCD, DD, Arzobispo kan Caceres
REV. FR. LUISITO A. OCCIANO, Direktor, Caceres Commission on Communications
REV. FR. GLENN C. RUIZ, Direktor, Commission on Liturgy
REV. FR. ERIC P. BOBIS, In-Charge, Social Media
JOHN PAUL M. AVEN asin **JUAN CARLOS R. MADRID**, Mga Editor

Hinimo asin inandam kan Archidiocesis nin Caceres, sa pangengenot kan Caceres Commission on Communications asin Commission on Liturgy. Ciudad nin Naga, Pilipinas • 2021

TABANGAN NA MASUSTENIR AN SAMBANWÁ!

Para sa mga donacion, puwedeng magdeposito sa:
Banko asin Branch: **BDO UNIBANK, INC. (BDO) PANGANIBAN DRIVE, NAGA CITY**
Account Name: **CACERES COMMISSION ON COMMUNICATIONS**
Account Number: **008440050319**